



SUATEA



COMUNICÁU DE PRENSA - EDUCACIÓN

Dende SUATEA, una vegada más vemos obligaos a denunciar les actuaciones y atropellos a los qu'esta Alministración y nesti casu la Consejería d'Educación tienos tan avezaos. El despreciu escontra'l so personal ye de tal índole que se tán dexando cesar a directores de les escueles de 0 a 3 años ensin falar con ellos personalmente, polo que tamos asistiendo a una situación insólita ya que dellos d'estos directores fueron informaos pola prensa, cuando se dirixieron a ellos pa preguntar pola so opinión.

El retayu de directores de les escueles de 0 a 3 años, namá puede debese a una política non yá de retayos, sinón empobinada a terminar con una rede pública calidable nesi tramu educativu. Nun se puede pensar nun centru educativu nel que nun esista un director o directora que tea a tiempu total nel centru, programando y diseñando, xuntu con tou l'equipu educativu, cuántes actividaes sían necesaries y convenientes pal desenvolvimientu afayadizu de los neños a los qu'atienden. Nun se trata de tener a los neños aparcaos nestes escueles de 0 a 3 años, la idea siempre foi y tien de ser la de potenciar el desenvolvimientu afeutivu-social, la comunicación, etc... nesta etapa de la vida, asina como facilitar la conciliación de la vida familiar y llaboral de les families. Al poner un director per zona tou esto lamentablemente va perdese. Y los que más van perder son les families y los alumnos/es, yá que nun van poder recibir los servicios qu'hasta agora -yos venía ufiertando.

SUATEA entrúgase ¿ónde ta la conciliación de la vida familiar y llaboral? si los usuarios nun pueden llevar a los sos fíos a una escuela infantil con un proyectu educativu que sepa potenciar y desenvolver toles capacidaes de los sos fíos y fíes. Nun se trata namá d'abrir escueles, nun se trata de dicir tou lo que se fai pal bienestar social de los ciudadanos y ciudadanes, si tou esto nun va acompañáu de personal que lo atienda nun vale pa nada. Tán encargándose d'un tiempu acá de desprestixar tou lo públicu y a toes aquellos persones que la faen posible, y agora paez que llegó'l momentu de dexar de faer lo que taba acordáu y que funcionaba bien, pa dexar que desapaeza ello solo, hai qu'esperar pacientemente a que los ciudadanos aburríos de que-yos tomen el pelo, empiecen a matricular a los sos fíos n'escueles de 0 a 3 privaes y yá ta. Ye cuestión de tiempu.

Comentao tou esto na Consejería, la rempuesta dada ye que nun piensen axustar con naide, que yá publicaron nel BOPA el resolvimientu pa les nueves contrataciones polo cual yá ta tou fechu, lo que pretenden ye garantizar puramente la "sostenibilidad" de les escueles.

SUATEA denuncia tamién la situación que se ta viviendo nel **CP Manuel Fernández Xuncos de Ribesella que teniendo 28** alumnos matriculaos en 3 años, en llugar d'abrir una aula nueva según un alcuertu de plantiya, lo que fai l'Alministración ye derivar a trés de los alumnos a un colexu acordáu. Esto calificámoslo d'absolutamente escandalosu primeru porque incumple'l **derechu fundamental de too padre a da-y al so fíu o fía una educación pública** y segundu porque ye un claru exemplu d'una política privatizadora que perxudica claramente la escuela pública. Ye evidente lo que quieren, yá que con esto "maten dos páxaros d'un tiru"; per un llau, aforrariense un puestu de trabayu nel colexu públicu y per otru llau seguiríen cola so política de privatización favoreciendo la escuela acordada en desterciu de la pública.

Uviéu, 20 de xunetu de 2010